

კულტურისა და კულტურული მემკვიდრეობის მართვის პოლიტიკის რამდენიმე ფრაგმენტის გამო

თანამედროვე საზოგადოების „საზოგადოებად“ თვითიდენტიფიცირების ერთ-ერთ მთავარ „მარკერს“ კულტურის მემკვიდრეობისადმი დამოკიდებულება განსაზღვრავს. კულტურული მემკვიდრეობა უამრავ მიმართულებას მოიცავს, მათ შორისაა ქვეყნის მხატვრულ-მატერიალური მემკვიდრეობა, ის, რასაც ხშირად კულტურული მემკვიდრეობის ძეგლების სახელითაც მოიხსენიებენ. ძალთა ბალანსი შემოქმედება-ქმნადობის ცოცხალ პროცესსა და უკვე არსებულ-შექმნილის მოვლა-პატრონობა-პრეზერვაციას შორის ურთულესი განსასაზღვრია. კაცობრიობის „კულტურული ცხოვრების“ საერთო ისტორიის ფონზე, კიდევ უფრო მკაფიოდ წარმოჩნდება თანამედროვე საზოგადოების, როგორც ერთგვარი „შემნახველის“, კულტურის „მომვლელისა“ და მისი სიცოცხლისუნარიანობის გამახანგრძლივებლის მძიმე, მაგრამ თავისი არსით „შემოქმედებითობის“ ტოლფასი მნიშვნელობა. აღნიშნული სხვაგვარადაც შეიძლება ფორმულირდეს და განისაზღვროს - განვითარებული საზოგადოების უალტერნატივო მაჩვენებელი მისი დამოკიდებულების რაგვარობაა საკუთარი (და არა მხოლოდ) კულტურის (მთლად ცოცხალი, ნაწილობრივ გადარჩენილი თუ მცირედ ნაშთებადღა შთენილი) მიმართ.

ბოლო 3-4 წლის კულტურისა და კულტურული მემკვიდრეობისადმი დამოკიდებულების ვრცელი ქრონოლოგიური „ჯაჭვიდან“ რამდენიმე „რგოლის“ ამოღება და მათ ძირეულ მოტივებზე ფოკუსირებაა ამჯერად ჩვენი ამოცანა. წერილის ფარგლებში ჩვენ მოვიხმობთ, ფორმით, გამოხატვითა და შინაარსით მოვლენათა „ოპოზიციებს“, რომელთა მორალური განსჯა თუ „სამოქალაქო ვერდიქტი“ მკითხველის პრეროგატივად გვესახება.

სხენებულ „ოპოზიციათა“ პირველი ჯგუფი შემდეგი სახით წარმოგვიდგება: 2023 წლის 4 თებერვალს საქართველოს ეროვნულ გალერეაში გაიმართა გამოფენა სახელწოდებით „ავტოპორტრეტი სარკესთან“, რომლის ერთ-ერთმა ახალგაზრდა მონაწილემ, სანდრო სულაბერიძემ გამოფენის გახსნისთანავე საკუთარი ნამუშევარი **ჩამოხსნა** და კედელზე, სადაც სურათი ეკიდა, საღებავით **დაიტანა** წარწერა: „ხელოვნება ცოცხალი და დამოუკიდებელია!“ აღნიშნული ფაქტის გამო, არტისტის მიმართ დაიწყო საქმის წარმოება ქურდობის მუხლით - სისხლის სამართლის კოდექსის 177-ე მუხლის მე-2 ნაწილის „ა“ ქვეპუნქტით, რომლის სასჯელიც განისაზღვრება შინაპატიმრობით ერთიდან ორ წლამდე ან თავისუფლების აღკვეთით სამიდან ხუთ წლამდე.

მომხდარს გამოეხმაურა საქართველოს ეროვნული მუზეუმი, შალვა ამირანაშვილის სახელობის ხელოვნების სახელმწიფო მუზეუმი და საქართველოს ეროვნული გალერეა. ყველა ოფიციალურ განცხადებაში დაგმეს სანდრო სულაბერიძის განხორციელებული აქტი, როგორც ვანდალიზმი. აღნიშნული ქმედება ცალკეული ჯგუფებმა შეაფასეს, როგორც ფსევდო-

პერფორმანსი. კულტურის სამინისტრო და შესაბამისი მიმართულების სახელმწიფო უწყებები კი აცხადებდნენ, რომ დაზიანდა საქართველოს ეროვნული გალერეის კედლები, როგორც კულტურული სივრცე (სურ. 1).

ამის პარალელურად და ცხადია, არა საპირწონედ:

2023 წლის 10 ოქტომბერს „მემკვიდრეობის პლატფორმამ“ გამოაქვეყნა ბრიტანელი პუბლიცისტისა და ფოტოგრაფის, პიტერ ნეისმითის გადაღებული ფოტო, რომელიც ასახავდა დუშეთის მუნიციპალიტეტში არსებული კულტურული მემკვიდრეობის უძრავი ძეგლის, ქოროლოს არქიტექტურული კომპლექსის შემადგენლობაში შემავალი, X საუკუნის „ბურგიანი“ კოშკის ნანგრევებს. გაირკვა, რომ 2022-2023 წლების განმავლობაში კომპლექსზე მიმდინარე „სარესტავრაციო-სარეაბილიტაციო“ სამუშაოების ფარგლებში X საუკუნის ეს უნიკალური სათავდაცვო ნაგებობა „გეგმურად“ დაანგრეს. აღსანიშნავია, რომ ქოროლოს არქიტექტურულ კომპლექსს 2006 წლის 7 ნოემბრის პრეზიდენტის ბრძანებულების საფუძველზე ეროვნული მნიშვნელობის კატეგორიის კულტურის უძრავი ძეგლის სტატუსი აქვს მინიჭებული¹ (სურ. 2).

აღნიშნული ფაქტი, ეროვნული მნიშვნელობის კატეგორიის კულტურის ძეგლის „მიზნობრივი“, შეიძლება ითქვას „მიზანმიმართული“ განადგურება, სრულებით **აუხსნელი** მოვლენა იყო დარგის სპეციალისტთათვის, როგორც საკითხით დაინტერესებისა და შესწავლის მომენტში, ასევე დღესაც. უნდა ითქვას, რომ დასახელებული „სარესტავრაციო-სარეაბილიტაციო“ პროცესები მიმდინარეობდა შესაბამისი უწყებრივი ნებართვების პირობებში და არ გახლდათ თვითნებური ქმედება, რაც კიდევ უფრო აბსურდულსა და ტრაგიკულს ხდის მომხდარს.²

მიუხედავად იმისა, რომ სრულებით ცალსახა და აშკარა იყო ეროვნული მნიშვნელობის კულტურული მემკვიდრეობის ძეგლის განადგურების ფაქტი და შესაბამისად, დანაშაული ქვეყნისა და მომავალი თაობების წინაშე - ზემოთ ხსენებული არც ერთი უწყება (მათ შორის არც საგამოძიებო, არც კულტურის სამინისტრო და მის დაქვემდებარებაში მყოფი სსიპ-ები³) მომხდარს არ გამოხმაურებია. აქ საგულისხმოა ძეგლთა დაცვის ეროვნული სააგენტოს როლი

¹ საქართველოს პრეზიდენტის ბრძანებულება N665, 2006 წლის 7 ნოემბერი, ქ. თბილისი, კულტურის ზოგიერთი უძრავი ძეგლისათვის ეროვნული კატეგორიის მინიჭების შესახებ.

²წინამდებარე სამუშაოების შეფასებისთვის იხ.: გიორგი ჩუბინაშვილის სახელობის ქართული ხელოვნების ისტორიისა და ძეგლთა დაცვის ეროვნული კვლევითი ცენტრის დასკვნა: „ეროვნული კატეგორიის კულტურული მემკვიდრეობის ძეგლზე, ქოროლოს არქიტექტურულ კომპლექსზე ბოლო დროს ჩატარებული სარეაბილიტაციო სამუშაოების შეფასება და რეკომენდაციები.“

³ ერთადერთი სსიპ, რომელიც კულტურის სამინისტროს „ექვემდებარება“ და იმავდროულად აქტიურად აკრიტიკებდა მიმდინარე პროცესებს გიორგი ჩუბინაშვილის ცენტრია. იხ.: გელათის მონასტრის სარეაბილიტაციო სამუშაოების შესახებ არსებული კრიტიკული დასკვნა: გელათის მონასტრის ტაძრების კონსერვაციის პრობლემები, მდგომარეობის შეფასება და რეკომენდაციები.

- უწყება, რომლის პირდაპირი მოვალეობაც გახლავთ მსგავს ფაქტებზე რეაგირება.⁴

მოხმობილი მაგალითები მსჯელობისა და ანალიზის არაერთ მიმართულებას ხსნის, რომელთა დეტალებსა და სიღრმეებს ჩვენ აღარ შევხებით - საგანგებოდ არ გამოგვაქვს დასკვნებიც, რომელთა ცალსახოვნებაც, ვგონებთ, სრულებით ნათელია და მაინც - „ვერდიქტი“ მკითხველის „ვალია“!

„ოპოზიციათა“ მეორე ჯგუფი კი შეიძლება შემდეგი სახით წავიკითხოთ: 2024 წლის 6 იანვარს სხვადასხვა სახის მედიასაშუალებით, სოციალური ქსელებით, საინფორმაციო გამოშვებებითა თუ სატელევიზიო გადაცემებით გავრცელდა ინფორმაცია, რომ თბილისში, სამების საკათედრო ტაძარში განთავსებული იყო ნეტარი მატრონა მოსკოველის ხატი. ცენტრალური ფიგურის ირგვლივ არსებულ, მომცრო ფიგურატიული კომპოზიციებით შეკრულ არშიაზე, სადაც წმინდანის ცხოვრების ამსახველი ეპიზოდებია გამოსახული, დატანილია ნეტარი მატრონასა და სტალინის შეხვედრის ამსახველი სცენა. ამ გამოსახულების კანონიკურობის საკითხი მოგვიანებით თავად საქართველოს საპატრიარქომ ეჭვქვეშ დააყენა, რომ აღარაფერი ვთქვათ თეოლოგებზე, ხატმწერებსა და დარგის სპეციალისტებზე.

ნეტარი მატრონა მოსკოველის ხატის სამების საკათედრო ტაძარში იმ „რედაქციით“ წარმოდგენა, რომელზეც სტალინი არა თუ უარყოფით კონტექსტში, თითქოს დადებითი პერსონაჟის სახითაც კია ასახული, ფართო საზოგადოების აღშფოთებისა და წყრომის საგნად იქცა. სწორედ ამის რადიკალური გამოვლინება იყო გარემოსდამცველისა და სამოქალაქო აქტივისტის, ნატა ფერაძის მხრიდან 2024 წლის 9 იანვარს ხატის მიწაზე საღებავის მისხმის ფაქტი⁵ (სურ. 3).

ამ ქმედებას უმძიმესი რეაქცია მოჰყვა ქვეყნის „კონსერვატიული საზოგადოებების“ მხრიდან - საქმე იქამდეც კი მივიდა, რომ ნატა ფერაძის სახლთან 2024 წლის 10 იანვარს საპროტესტო აქცია მოეწყო რამდენიმე მოთხოვნით, მათ შორის უმთავრესი იყო მისდამი სისხლისსამართლებრივი

⁴ შესაძლოა უფრო ლეგიტიმური, კორექტული და მართებული მაგალითი ს. სულაბერიძის „დასჯადი ქმედების“ საპირწონედ გიორგი გაჩეჩილაძის (უცნობი) აქცია ყოფილიყო, რომლის ფარგლებშიც მან 2021 წლის 9 აპრილს, მის მიერვე ორგანიზებულ აქციაზე, „ევროპის მოედანზე“ არსებულ ქართულ-გერმანული მეგობრობის სიმბოლოზე, ბერლინის კედლის ფრაგმენტზე „პულვერიატორით“ განათავსა წარწერა: „ღმერთი სიყვარული არს“. აღნიშნული ფაქტის გამო მას (რამდენადაც ცნობილია საკმაოდ დაგვიანებით), მხოლოდ მერიის მიერ **„გაგზავნილი“** 1000 ლარიანი ჯარიმის გადახდა მოუწია. ინფორმაციის მოწოდებისა და წერილობით მუშაობის პროცესში აქტიური დახმარებისთვის მადლობას ვუხდით გიორგი ჩუბინაშვილის ცენტრის მეცნიერ-თანამშრომელს - თეიმურაზ ქანთარია-ჭაბადარს.

⁵ აქვე დავძენთ, რომ გამოხატვის მსგავსი ფორმა და საზოგადოდ, ყოველგვარ სინამდისთან თუ საკრალურ სივრცესთან (განურჩევლად კონფესიური კუთვნილებისა) დამოკიდებულების გაცხადების რადიკალური მიდგომა, იდენტიფიცირებული, როგორც „გამოხატვის თავისუფლება“ ან კი „შემოქმედებითი თავისუფლება“ საფრთხის მატარებელია და უმართებულოდ მიგვაჩნია. მკაფიოდ უნდა გავიაზროთ, რომ გამოხატვის თავისებურებები იმავდროულად გარკვეულ კორექტულობასაც მოიცავს საკუთარ თავში, რაც არაფრით ზღუდავს სამოქალაქო პოზიციის, პირადი მოსაზრებისა თუ კრიტიკული სჯის შესაძლებლობასა და აუცილებლობას.

დევნის დაწყება.⁶ აქციის ფარგლებში, გაჟღერდა მუქარისშემცველი ფრაზებიც: „მაგას ან სახელმწიფო მიხედავს, ან კონკრეტულად ჩვენ მიხედავთ...“, „ან სახელმწიფო მიხედავს, ან სხვანაირად მიეხედება“. საყურადღებოა, რომ აღნიშნულ სულისკვეთებას იზიარებდა არა მხოლოდ საზოგადოების დიდი ნაწილი, არამედ პოლიტიკური წრეები და თანამდებობის პირების გარკვეული ჯგუფიც.

ეს მაშინ, როდესაც:

2019 წელს გელათის სამონასტრო კომპლექსში რამდენიმე წლის განმავლობაში მიმდინარე საფასადო ქვის კონსერვაციისა და სახურავების მოწყობის პროექტი დასრულდა და იმავდროულად თავი იჩინა ურთულესმა ხარვეზებმა, რომელთა მოგვარებაც, არათუ მყისიერად, არამედ დღემდე ვერ მოხერხდა. აღმოჩნდა, რომ მრავალწლიანი პროექტის განხორციელების პროცესში დაუშვეს (დღეს უკვე შეგვიძლია თამამად ვთქვათ - გამოუსწორებელი!) ხარვეზები, რომლის ერთ-ერთი მთავარი მიზეზი გახლდათ არა იმდენად უხარისხო მასალა, რამდენადაც გულგრილობა და არაკომპეტენტურად, არაკვალიფიციურად შესრულებული სამუშაოები. ყველაზე უფრო მძიმე აღმოჩნდა ის, რომ ახლად გამართული სახურავიდან, რომლის კამარები შევსებული იყო სხვადასხვა სახის არაორგანული მასალით, წყალი ჩავიდა ტაძრის ინტერიერში, რამაც სავალალო მდგომარეობაში ჩააგდო ტაძრის მრავალსაუკუნოვანი მონუმენტური მხატვრობა. 2021 წლის 22 მარტს საქართველოს კულტურის, სპორტისა და ახალგაზრდობის სამინისტროს მმართველობა შეიცვალა. განახლებული უწყების უმთავრესი გზავნილთაგანი იყო გელათის სამონასტრო კომპლექსის მთავარ ტაძარსა და წმ. ნიკოლოზის ეკლესიაში არსებული ურთულესი მდგომარეობის გამოსწორება წარმოადგენდა, თუმცა „რეაბილიტაციის“ ახალი პროექტი, რომელიც თავის მხრივ, ძველი ხარვეზების (უფრო მკაფიოდ რომ ითქვას - დანაშაულების!) გამოსწორებას გულისხმობდა, ასევე არაკვალიფიციურობისა და არაკომპეტენტურობის აშკარა ნიშნით იყო დაღდასმული. ისევე როგორც 2019 წლის „რეაბილიტაციის“ პროცესებისა და მისი შედეგების აღმოფხვრა-გამოსწორების მიზნით, 2021 წლის ახალი ეტაპიდანაც, პროფესიული საზოგადოება ყველა შესაძლო საშუალებით ცდილობდა პროექტის მენეჯმენტის, მისი განხორციელების გზებისა თუ შემსრულებელი ჯგუფების მიმართ არსებული კრიტიკული შენიშვნების მითანას შესაბამის უწყებებთან, თუმცა მცდელობები ორივე შემთხვევაში უშედეგოდ დასრულდა (სურ. 4).

იმ უამრავ სირთულეს, ხარვეზსა თუ შეუსმენლობას, რაც წარმოჩნდა 2019 წლიდან გელათის სამონასტრო კომპლექსში, არ შევეხებით. აღვნიშნავთ მხოლოდ, რომ ამ ყველაფერს 2022 წლიდან დაემატა მთავარი ტაძრის კედლის

⁶ წინამდებარე სტატიაზე მუშაობა თითქმის დასრულებული იყო, თუმცა ვიდრე წერილს ჟურნალის სარედაქციო ჯგუფს გადავცემდით (2024 წლის 2 თებერვალი), გაირკვა, რომ ნატა ფერაძე დააკავეს და სასჯელის ვადად განესაზღვრა ხუთდღიანი პატიმრობა...

მხატვრობის კონსერვაციის მეთოდოლოგიაში დაშვებული გამოუსწორებელი შეცდომები, რაც გულისხმობდა მხატვრობის უკვე დაკარგული ნაწილების აღდგენას. მსგავსი ქმედება ცალსახად შეიძლება კვალიფიცირდეს, როგორც **ფალსიფიკაცია!**

ნეტარი მატრონა მოსკოველის ხატის საკათედრო ტაძარში განთავსების პროტესტს მოყოლილი **დევნა** და გელათის „რესტავრაცია-რეაბილიტაციის“ ჩავარდნილი, ორეტაპიანი პროექტის ნიველირება იმავე „კონსერვატიული საზოგადოებების“ მხრიდან, აშკარა ანაქრონიზმზე მიუთითებს:

საზოგადოება, რომელიც ხატის დამცავი მინის ზედაპირზე მცირე რაოდენობის საღებავის მისხმას საეკლესიო ღმრთისმსახურებისთვის ხელის შეშლად, ეკლესიის დევნად და შეურაცხყოფად აფასებს, გაუგებარია რატომ არ რეაგირებს არანაირად გელათის სამონასტრო კომპლექსში წლების განმავლობაში მიმდინარე კედლის მხატვრობის „**ჩამორეცხვის**“ დინამიკაზე?

თუკი სისხლისსამართლებრივი დევნის ობიექტი შეიძლება იყოს პირი, რომელმაც ხატის დამცავ მინას, სტალინის პერსონისადმი პროტესტის ნიშნად, საღებავი შეასხა (რომლითაც, რეალურად ხატი არ დაზიანებულა), მაშინ რატომ არ მოჰყვა პროტესტი და ულტიმატუმებიანი აქციები გელათის უნიკალური სულიერი მემკვიდრეობის მიზანმიმართულ გადახატვა-გაყალბება-ფალსიფიკაციას?

როგორ დადუმდა ქართული საზოგადოება ქოროლოს სამუდამოდ განადგურებული კოშკის მხილველი (რადგან იქ რაც უნდა აშენდეს თავიდან, ის X საუკუნის ძველი ვერაფრით იქნება) მაშინ, როცა გალერეის კედელზე დროებით მიწერილ ტექსტს, მსგავსი დაუცხრომელი ვნებათაღელვა მოაყოლა.

დასახელებული ორივე „ოპოზიციის“ შემთხვევაში ფაქტია ღირებულებათა თუ ფასეულობათა სრული აღრევა, ორმაგი სტანდარტებით განსჯა ამა თუ იმ მოვლენისა, საკითხების პოლიტიზების მცდელობა, კულტურის შემსწავლელი უწყებების დისკრედიტირება, კულტურული მემკვიდრეობის და საზოგადოდ ქართული კულტურის არაკომპეტენტურობით (ზოგ შემთხვევაში მიზანმიმართული!) განადგურება...

იმის მიუხედავად, რომ მსგავსი დაპირისპირების ხერხი მოვლენის კიდევ უფრო მეტი მკაფიოებით წარმოჩენისთვის მოვიხმეთ, კიდევ ერთხელ დაბეჯითებით აღვნიშნავთ, რომ ცხადია მათი ურთიერთ საპირწონედ წარმოდგენა, თითოეულის შინაარსობრივი თუ ისტორიულ-კულტურული მნიშვნელობიდან გამომდინარე, სრულიად დაუშვებელია.